

PRESENTATION

by Katalaina Sapolu

Roundtable with Parliamentarians: Strengthening Partnership/Cooperation Between Parliament and Ombudsman NHRI Samoa, Friday 4 September, 2020 (APIA, Samoa)

Faafetai i lau Susuga a le Tamaitai Pule o le Ofisa o Aia Tatau o Tagata Soifua o loo faafoea le faatalatalanoaga i lenei aoauli. Afifio ma eetai le paia lasilasi ma le mamalu i sui o le Palemene o Samoa. Faatalofa atu foi i le Afioga i le Komesina o Sulufaiga, o au soatau ma le mamalu o lou Ofisa.

Ae o le a ou agai tonu loa i le mataupu na vaalauina ai au oute tautala iai i le asō – o se vaaiga lea i ni aafiaga poo ni manatu i le galue ai i le siosiomaga faavaomalō ma le maitauina o matafaioi o sui o Palemene ile puipua o aia tatau a tagata soifua ma sootaga ma Ofisa mo Aia Tatau a Tagata Soifua (NHRIs). Sa ou faigaluega i le ofisa faa-failautusi a Malo o le Taupulega a Peretania mo tausaga tuufaatasi e 13 i mataupu tau Tulafono atoa ma le puleaina i se tasi tofiga o galuega i pulega faaletulafono, o le faatemokarasi, aia tatau o tagata soifua ma pulega lelei. Ma oute maitauina i lea taimi atoa, le faagasologa o le atinaega ole faalauiloaina ma le puipua o aia tatau a tagata soifua i totonu o le Commonwealth. Poo le tausaga 2004/2005, na faatuina ai se taumafaiga a le Failautusi Aoao o le Commonwealth, Sir Don McKinnon, (Secretary-General’s Human Rights Initiative) ina ia uunaia atunuu o le Commonwealth e saina atu i feagaiga faavaomalō e faatatau i aia tatau a tagata soifua.

O le atinaega o ni taiala faavae mo le galulue vavalalata ai o NHRIs ma Palemene, na muai faatalatalanoa i se fonotaga a le Ofisa o le Komesina o Aia Tatau a Tagata Soifua a le Malo Afaatasi, i Belgrade, Serbia, ma taunuu ai i le Belgrade Principles. Ma e aofia ai le faia o Tulafono e faatu ma faatino ai galuega a NHRIs, o lona tutoatasi tautupe, o le lipoti sao o le NHRI i le Palemene, galulue faatasi i luga o Tulafono taufaaofi, atoa ai ma galuega faavaomalō i le sainia o ni feagaiga, ma mataituina le tali atu ma le faatinoga e le Malo o ona tiute i lalo o ia feagaiga.

O se suiga i le aloaiaina ma le faatāuina o le matafaioi a sui o Palemene i le faalauiloaina ma le puipua o aia tatau a tagata soifua, na tulai mai ia Mati i le tausaga e 2013 i se iugafono a le Komiti o Aia Tatau a Tagata Soifua a Malo Afaatasi (Human Rights Council), ina ua aliali mai, ua tele na’uā feagaiga ua fai i aia tatau a tagata soifua, ae vaivai pe leai foi so latou faatinoga. I lea iugafono, ua se’e ese mai le Komiti i le galuega masani o le faatulagaga o tulaga faatonuina, i le atinaega lea o se Polokalame mo le Faatinoga a le Lalolagi Atoa, poo le Global Implementation Agenda, e uunaia ai le faatinoga i totonu o atunuu o o latou tiute i lalo o feagaiga faavaomalō i aia tatau a tagata soifua ua saina atu iai ma faamaonia.

Ma ua atagia atu i le Komiti, a aunoa ma le auai o sui o Palemene i lea polokalame o faatinoga, o le a lē mafai e atunuu ona ausia faamoemoega o feagaiga faavaomalō ua iai, pe faataunuu o latou tiute i lalo o ia feagaiga.

Aisea ua manatu ai le Komiti lea, e iai le saofaga taua a sui o le Palemene i le faalauiloaina ma le puipua o aia tatau a tagata soifua?

O le mafuaaga muamua, o le matafaioi lea a le Palemene, o le faia o Tulafono (role of Parliamentarians as law makers). O le tele o ni fautuaga e tuuina atu e NHRIs i ni faafitauli e tulai mai o loo oia, pe ono solia ai aia tatau ua aloaia faavaomalō, e tele ina taunuu i le faia o se Tulafono fou, poo le teuteuina o se Tulafono o loo iai. O ai la e faia lea galuega? O Faipule faitulafono.

O le mafuaaga lona lua, o le mataifaioi lea a le Palemene, i le iloiloaina ma le pasiaina o le Tala ole Tupe. I le talanoaina o le Tala o le Tupe e pei ona silafia e a tou Afioga, e vaevaeina le tupe e tusa ai ma faiga faavae a le Malo e ave iai le faatāua ma le faamuamua. E matua tele la le sao o le Palemene mo le puipuia o aia tatau Tagata Soifua, i le faasoaina ma le vaevaega o le tupe e talafeagai ma le faatinoga o polokalame atinae ma le faalauiloa, le pulega o ofisa, ma le totogi o tagata faigaluega o loo faatinoina le galuega.

O le mafuaaga lona tolu, o le mataifaioi lea o le vaavaaiga aoao (oversight role) a le Palemene, i luga o le Malo, poo le Executive. Ua outou silafia, o le Malo e sainia feagaiga faavaomalo. O le tele o nisi atunuu, e fai lava e le Malo le faaiuga poo le a le feagaiga e saini iai e aunoa ma le tuuina atu o le mataupu i luma o le Palemene. E faapea foi, a maua mai fautuaga mai fono faavaomalo, e gata lava i le Ofisa o Mataupu Tau Va i Fafo, pe faaso atu foi, i Ofisa poo Ministries e pau iai lea mataupu ma lea mataupu. E iai tiute tauave o Malo i lalo o feagaiga faavaomalo. E mafai e le Palemene i lona malosiaga faa-vaavaaiga aoao, ona fesiligia le Malo e tali pe lipoti atu i le faatinoga o fautuaga poo ni tiute i lalo o feagaiga faavaomalo, i aia tatau faatagata soifua.

Ma le lona fā, o le toe tulitatao lea o fautuaga ma faaiuga i lo latou faatinoga (follow-up and implementation). E fesoasoani ma aogā i lea gaoioiga, le faatuina o Komiti faapitoa faa-Palemene mo aia tatau a tagata soifua e pei ona iai i Nigeria, Uganda ma South Africa o atunuu i Aferika e tele faafitauli e aafia ai aia tatau a tagata soifua. I Nigeria, ua mafai lava e le Komiti faa-Palemene, ona faia suesuega i se mataupu ma valaau molimau. O South Africa, o le isi tiute a lana Komiti faa-Palemene, o le suesueina lea o lipoti e ave i Geneva i lloiloga Lautele Faavaitimi (Universal Periodic Review) ao lei faia le iloiloga. O nisi atunuu, ua faaopoopo atu aia tatau, i isi mataupu tauave a se Komiti ua uma ona faatu. E faapea foi i Ausetalia. O le manatu i nei atunuu, o le aogā o ia Komiti faa-palemene, e faigofie ona faaso ia mataupu i le va lava o Faipule latou, e aunoa ma se faalapotopotoga poo se isi itu-tino o le Malo, e avatu nao faitioga, ma laga atu nao itu e lē talafeagai ai se Tulafono taufaaofi ma aia tatau. E pei e sili atu ona amanaia e Faipule manatu o isi Faipule, nai lo se manatu mai fafo atu.

O se tasi itu taua ua faamamafaina, o le Palemene o le Leoleo o aia tatau a tagata soifua (guardian of human rights), ona i nisi atunuu, e tau solomua i le Malo ona solia aia tatau a tagata (*Note: in some countries, Governments are known to be perpetrators of human rights violations through the engagement of its police and military forces*).

Ua amanaiaina foi sui o Palemene e taitai i le puipuia o aia tatau o tagata soifua, ona o latou e taitai i le faagaganaina o manatu o tagata lautele ma e mafai ona latou atinaeina tu ma aga e faavae i luga o aia tatau o tagata soifua i totonu o latou atunuu. Ua iai foi se manatu o nisi, sei tulou ou uso a loia o loo galulue i lea vaega o le Tulafono, o aia tatau a tagata soifua, e lē o ni mataupu e manaomia tele ai se poto faapitoa. O le tele o taimi, e manaomia talanoaga ma ni faaiuga faaupufai o Malo (e ui lava o nei faaiuga e faavae i luga o le Tulafono). I se gagana lata mai, e lē mafai na lē alofia le polokiki. Faataitaiga – i le atunuu o Malawi na faa-falepuipui ai ni alii se toalua ona ua tuuaia ua la faia amio faasotoma. O lenei mataupu na faasalalau solo i le tele o nusipepa ma televise i atunuu tetele o le lalolagi, ona faapea ua matuia le faasalaga ma ua solia o laua aia tatau faa-tagata soifua. Ae na iu ina tuu le finauga faale-tulafono, ae ua osofa'i faiga faavae ma pulega lē lelei o le Malo o lea atunuu.

Pipitea Declaration

Ona ou iliu mai lea i le tatou itulagi, le Pasefika; sa faia se fonotaga a le Commonwealth i Niu Sila ia Aokuso 2015, sa auai ni faipule mai Samoa. O le taunuuga o lea fonotaga, o le **Pipitea Declaration** o loo faataatia ai ni tautinoga i gaoioiga e faia e sui o Palemene mai le Pasefika, mo le faalauiloa ma le

puipua o aia tatau a tagata soifua. Ma o loo faamamafaina i lea Declaration, le faaogaina o le tulaga ese (unique status) o sui o le Palemene e uunaia faiga faavae ma tala o tupe i o latou lava atunuu, atoa ma le mataituina o polokalame mo le faatinoga o faiga faavae; faatalatalanoa o manaoga ma atugaluga o o latou itumalo faafaipule, ma avea i latou ma auala (catalyst) e mafai ona tino mai ai le amanaia o aia tatau i tulaga uma lava.

O nisi o tautinoga e aofia ai le fautua mo taiala faavae o aia tatau ia atagia mai i Tulafono; o le uunaia o faatalatalanoaga o aia tatau ma le galulue faatasi o Palemene, Ofisa o aia tatau, ma faalapotopotoga tumaoti i le faalauiloa ma le puipuiga o aia tatau ma saolotoga faa-faavae.

Sini mo Atinae Gafatiataulimaina (Sustainable Development Goals (SDGs))

Ae lei faaii lau folasaga, oute fia faatepa lava lo tou mamalu i le Polokalame mo le 2030 mo Atinae Gafatiataulimaina (2030 Agenda for Sustainable Development). O le faataotoga lea mo le atinaega o atunuu uma o le lalolagi, e aofia ai atunuu e malolosi o latou tamaoaiga ma atunuu vaivai.

E 17 sini (SDGs) o lenei polokalame ae 169 ona matatia poo taulaiga autu (targets). I suesuega ua faia i nei sini, o le 90% o matatia nei e 169, e faavae i luga o aia tatau a tagata soifua.

Faaiuga (Conclusion)

Ma oute faaii atu ai ma le faaaloalo lava e faapea. O loo i aao o a tou Afioga le faatinoga o le matafaioi taua mo le atiinaeina o si o tatou atunuu e ala atu i Tulafono e faatino ai faiga faavae a le Malo. E tutotonu i sini o atinae gafatiataulimaina poo sustainable development goals, le faaupuga faa-Peretania, *“no one, should be left behind”*. O lona uiga, ia aua nei o tatou tuulafoaina se tagata e tasi. E afifi mai i lenei faaupuga i sou manatu vaivai, ia tautuana ma i tatou aia tatau a tagata soifua; e tutusa uma, poo ai le tagata; poo fea e sau ai, ia laugatasia i faamanuiga o atinae eseese.

O le fuifui lua ma le sootaga taua lea o aia tatau o tagata soifua ma atinae gafatiataulimaina, oute talitonu o le a fesoasoani i le atinaega o polokalame e faatino ai feagaiga faavaomalo i aia tatau a tagata soifua ua sainia ma faamaonia e Samoa. Ia, e lē faapea o le a tuufau, sei tulou, nei iai lava se popolega i nisi o aia tatau e tau faaofi mai fafo. E iai āi talafeagai oute talitonu o loo iina ia tou Afioga o sui o le Palemene, le uta ma le tofā loloto e fuafuaina ai, faale-tulafono, e tusa ma la tatou tu ma aganuu, ma le siosiomaga o lo tatou ola ma outou soifua ai.

Ia manuia taualumaga o totoe o lenei faatasiga. Faafetai tele mo le avanoa.

